

20 OCT 1999

VENEZUELA-MALAYSIA

VENEZUELA, M'SIA SETUJU MENGENAI PERJUANGAN GLOBALISASI

KUALA LUMPUR, 20 Okt (Bernama) -- Malaysia dan Venezuela bersetuju bahawa adalah penting menyahut perjuangan negara-negara Dunia Ketiga yang menghadapi serangan globalisasi.

"Perdana Menteri (Datuk Seri Dr Mahathir Mohamad) dan saya bersetuju, adalah penting bagi kita sendiri yang menentukan perjuangan rakyat Dunia Ketiga, terutamanya dengan kehadiran globalisasi," kata Presiden Venezuela Hugo Chavez Frias.

Globalisasi kadang kala menyalah tafsirkan sesuatu dan tidak mengenali sempadan antara negara, kedaulatan negara, keiltizaman negara, dan ia tidak mendatangkan sesuatu yang baik kepada dunia," katnaya.

Chavez berkata Venezuela dan Malaysia juga bersetuju supaya mengatur usaha di Asia, Carribbean, Amerika Latin dan Afrika untuk memperkukuhkan Kumpulan 15, pertubuhan yang penting bagi negara-negara Dunia Ketiga.

Beliau berkata bahawa Venezuela telah bersetuju untuk membuka sebuah pusat untuk kajian Asia dan berharap Malaysia akan membuka pusat yang serupa untuk kajian Amerika Latin.

Chavez berkata pengisytiharan bersama yang ditandatangani kedua-dua buah negara membuktikan kejayaan lawatannya ke Malaysia.

"Tujuannya ialah mengkaji semula semua perjanjian yang telah ditandatangani sejak kebelakangan antara Venezuela dan Malaysia, mengemaskini, dan melancarkannya semula untuk masa depan.

"Kami juga sedang mengkaji semula projek-projek bersama untuk cadangan masa depan, termasuklah yang berkaitan dengan industri petrokimia."

Chavez mengulangi bahawa Malaysia dan Venezuela semalam telah memutuskan untuk menggerakkan semula suruhanjaya bersama masing-masing dalam usaha mempererat serta memperbaharui hubungan dua hala dan kerjasama.

"Suruhanjaya bersama itu tidak bermesyuarat sejak 1991 dan sekarang kita akan bertemu di Caracas sebelum akhir tahun ini," katanya.

-- BERNAMA

WNZ MA